

ӨМІРІН ӨЛЕҢМЕН ӨРГЕН

Филология және әлем тілдері факультеті шетел филологиясы және аударма ісі кафедрасы оқытушыларының және «Шетел филологиясы» мамандығының 1-курс студенттерінің ұйымдастыруымен «ҚазҰУ студенті оқуға тиіс 100 кітап» жобасы аясында аса көрнекті ақын Мұқағали Мақатаевтың республика көлемінде дәстүрге айналған туылған күні құрметіне арналған «Өмірін өлеңменен өрген ақын» атты әдеби-сазды жыр кеші өтті.

Ақынның дүниеге келу тарихынан бастап, асыл жырларымен қалың жұртшылықтың махаббатына бөленген ақынның еңбек жолдарын паш ететін көріністер, өз дауысынан жазылған өлең-жырлардан үзінділер кеш келбетіне арқау болып, көрермендер көңілін жыр әлеміне самғатты. 45 жасында дүниеден озған ақын 1 минут үнсіздікпен еске алынды. Осыдан соң Қадырқұл Алтынай «Three happy things», Жолаушыбай Асел «Kazakh Land», «Dialogue of Love» өлеңдерін ағылшын тілінде оқыса, «Қазақ филологиясы» мамандығының студенттері Аяжан Чакиртова «Шыда» атты өлеңін, ал Ғазиза Рүстембек ақынның «Поэзия» өлеңін және өзінің «Мұқағалиға арнауын» мәнеріне келтіре орындады.

Кешке қатысқан шетел филологиясы және аударма ісі кафедрасының профессоры, филология ғылымдарының докторы Әнуар Тарақ Мұқағали Мақатаев мұрасы — мәңгілік поэзиясы туралы, өзінің балалық шағында ақынмен жүздесу бақыты бұйырғанын, шынында да, «Артына өлмейтұғын сөз қалдырғаны» жайлы мазмұнды әңгіме өрбітті.

**Магүлсім ЖАҢАБЕКОВА,
Әліби ӘРІПОВ,**

*шетел филологиясы және аударма ісі
кафедрасының оқытушылары*